

DR LETSCHT UF DR PARTY

U iz bisch langsam aber sicher im ne Auter wo aui um di ume aföh zäme zieh und über Ching rede. U zwar über eigeiti Ching, nid eifach so über Ching wi mä früecher über Ching het gredt. Ching wärde plötzlech zum schönste wo me sech cha vorsteue, während me sech jahrelang gschwore het: Lieber ä Hung aus es Ching.

Di erste hürate u hei ä Wunschbaum im Wohnzimmer während du mit dine zwöi Mitbewohner zämeleisch für es nöis Game uf dr Playstation z choufe.

Si wei Eutere si. Wäg de Tröim, villedch o chly wägem Mami. Nid wäg dr Konvention u sicher nid wäg em Money.

U du dänksch: schön, i bi Velokurier. Wäg em Style weisch, wäg de Wadli. Nid wäg em Struggle u sicher nid wäg em Money.

***De ufblasbar Globus het es Loch
u si flickes mit em ne Chätschi
U du duesch so aus wär nüt gsi***

***Si mir speter mau im Museum
Oder immer no im Däuhöuzli?
Du bisch dr letscht uf dr Party***

Während die auso über Ching, Ihbou-Chuchine und ds nöie E-Bike rede, probiersch du grad dim Auter entsprächendi Chleider z finge. Du choufsch es Hemmli u aui frage di, öb'd wosch hürate. Nei wosch nid. Du wosch eigentlech nid mau a die Hochzyt wo'd iz äbä iglade bisch u wo'd äxtra das Hemmli kouft hesch derfür.

Dert stöh si när mit ihrem gsprütze Wysse u ihrne kaki-farbige Chinos, ir einte Hang dr Nuggi vo dr Chlyne, während du nachem sibte Biersch seisch, es sigi z erste.

Si wei Vorbiuder si. Wäg dr Zuekunft, villedch o chly wägem Mami. Nid wäg em Lob u sicher nid wäg em Money.

U du dänksch: hey, immerhin bin i kes Arschloch. Wäg de Gfüh u vorauem o wägem derbi si. Nid wäg de eigeite Problem u sicher nid wäg em Money.

***De ufblasbar Globus het es Loch
u si flickes mit em ne Chätschi
U du duesch so aus wär nüt gsi***

***Si mir speter mau im Museum
Oder immer no im Däuhöuzli?
Du bisch dr letscht uf dr Party***

Verstah mi nid fautsch: Ching u Ihbou-Chuchine si legitimi Investitione. Ds E-Bike ersch ab em ne gwüssen Auter, aber i drücke mau es Oug zue. Wichtig isch doch das aui ihres Glück finge u wes de irgendwo no es bitzli für di het, isch doch aues super easy. U si mer mau ehrlech: so ne Schwur das me nie so wird wi die, cha me mit em Auter scho mau vergässe.

Da hocksch iz auso vor dire Playstation, d Mitbewohner si scho lang mit ihrne Fründinne zäme zoge, hei sech ä Skoda Octavia kouft u du brüchtisch Stutz für ds nöiste Game.

Si wei nüm si wi du. Wäg de Ching, villedch o chly wägem Mami. Nid wäg dr Freiheit u sicher nid wäg em Money.

U du dänksch: fuck, i bi zfride. Wäg dr Tröii zu mir säuber, o chly wäg em Götti. Nid wäg dr Rueh u sicher nid wäg em Money.

***De ufblasbar Globus het es Loch
u si flickes mit em ne Chätschi
U du duesch so aus wär nüt gsi***

***Si mir speter mau im Museum
Oder immer no im Däuhöuzli?
Du bisch dr letscht uf dr Party***